

## Zijad Jagodić

1. Inicijativa upućena entitetskim i kantonalnim vladama u BiH – „Imajući u vidu da se u većem broju preduzeća u državnom vlasništvu, a koja negativno posluju, upravni ili nadzorni odbori kao i uprava mjesečno nagrađuju po raznim osnovama, kao i u preduzećima koja uspješno posluju, a čak negdje i više, ovim iniciram, a s ciljem eliminacije tih propusta i dovođenja najuspješnijih kadrova, da se što hitnije pristupi izmjeni onog dijela zakona koji definira mandatni period navedenih, i to tako da se oni u slučaju negativnog poslovanja više od godinu i po dana obavezno smjenjuju.“
2. Inicijative upućene Vijeću ministara BiH:
  1. „Kao zemlja i država ne samo u proteklom periodu, već i danas, iz neobjašnjivih razloga ne koristimo izuzetno velika finansijska sredstva koja nam stoje na raspolaganju kod evropskih institucija u pogledu ekologije, odnosno zaštite životne okoline, uz činjenicu da je ta oblast velika šansa za naš ekonomski, energetski, pa time i ekološki oporavak i održivost. S obzirom da sam u prošloj godini ovo isto inicirao, ali da Vlada u tehničkom mandatu nije ništa učinila na tome, ponovo iniciram da novi saziv Vijeća ministara, na državnom nivou, pripremi i u parlamentarnu proceduru dostavi Zakon o zaštiti životne okoline, te uspostavi odgovarajuće tijelo čije osnivanje iniciraju i traže predstavnici EU (ministarstvo, agenciju ili komisiju) koji bi ovu oblast mogli adekvatno provoditi i pratiti na nivou cijele zemlje.
  2. S obzirom da u posljednje vrijeme više stotina ljudi u BiH ne samo da skupo plaća i trpi bolove, već i umire čekajući u redu na transplantaciju organa, neophodno je to ozbiljnije shvatiti. Budući da nemamo zakon o donorstvu organa na nivou države, a ni drugo povoljno rješenje, iniciram da Vijeće ministara BiH pripremi i u što skorije vrijeme uvrsti u parlamentarnu proceduru ovaj zakon kojim bi se problematika donorstva organa i transplantacija povoljno riješila.
3. Inicijativa upućena Kolegiju Predstavničkog doma – „Kao poslanik u ovom parlamentu dobio sam dopis od vojnog advokata iz Pentagona gospodina Šona Glejsona u kojem me on moli za moj glas i pomoć pri oslobađanju Tareka Mahmouda Ahmeda El Savaha, oca dvoje bosanskohercegovačke djece koja žive u Zenici, Amire i Sare. Naime, gospodin Savah se već 10 godina nalazi u zatvoru Gvantanamo na Kubi a stavlja mu se na teret saradnja s Al Kaidom, ali do sada bez ikakvih dokaza i sudskih rasprava o tom pitanju. Ovom prilikom iniciram da Predstavnički dom PSBiH o ovom pitanju zauzme stav i uobičajenim putem adekvatno odgovori gospodinu Glejsonu, vojnom advokatu Pentagona, s ciljem pomoći i podrške kako Ahmedu Savahu, tako i Amiri i Sari kao našim državljanima.“
4. Pitanje postavljeno Graničnoj policiji BiH – „Zašto Granična policija BiH i njeno rukovodstvo već godinu dana ne postupa prema pravosnažnim sudskim presudama Suda u Zvorniku i Bijeljini a u pogledu vraćanja na posao zaposlenika Hajrudina Babajića i da li je to način poštivanja propisa ove zemlje?“
5. Pitanje postavljeno Uredu za reviziju institucija BiH – „Imajući u vidu da sam ovo pitanje postavio već prije 3,5 mjeseca i da do danas nisam dobio nikakav odgovor, ponovo postavljam isto pitanje: Ured za reviziju institucija BiH je, prilikom revizije, uočio da je više budžetskih korisnika tokom godine angažirao lica po ugovoru o djelu, a za obavljanje poslova koji su predviđeni važećom sistematizacijom, pri čemu su nakon

određenog perioda ta lica samovoljno angažirali za rad na neodređeno vrijeme. Postavljam pitanje: Da li je ijedna nadležna institucija odnosno inspekcija bilo koga od navedenih u skladu s važećim propisima sankcionirala za takva ponašanja i šta Ured po uočenim opaskama preduzima?“

6. Pitanje postavljeno Ministarstvu za ljudska prava i izbjeglice BiH – „S obzirom da sam ovo pitanje postavio prije više od pola godine te da ni do danas nisam dobio nikakav odgovor, zbog toga ponovo postavljam isto pitanje: Šta je sa zakonom o iseljeništvu i aktivnostima u tom pogledu, imajući u vidu ogromne a neiskorištene mogućnosti i kapacitete tih naših građana?“